

Ainda no tin ningun acuerdo

Trahadonan di ex Westin kier mas claridad riba trabou y salario cu Aruba Hotel Enterprises ta ofrece

ORANJESTAD – Manera Bon Dia Aruba a publica, siman pasa tabatin dos dia di reunion entre e grupo di trahadonan di ex Westin, Aruba Hotel Enterprises (AHE) y RIU.

Te ainda no tin claridad y tampoco acuerdo firma. E grupo di trahadonan kier haya mas claridad riba e funcionnan cu RIU ta ofrece y tambe asunto di salario.

Claridad riba funcionnan
Bon Dia Aruba a papia cu

abogado mr. Figaroa, pa haya sa si a yega na un acuerdo. E abogado, kende hunto cu su colega mr. Faarup ta representa e grupo di trahadonan, a duna di conoce na Bon Dia Aruba cu despues di a reuni cu e trahadonan, e trahadonan a expresa cu nan no ta mucho contento cu e posicionnan cu RIU a ofrece na nan y tampoco e salarionan. E abogado a bisa cu a manda carta pa e abogadonan di RIU y AHE caminda a pidi nan pa manda un lista completo di tur e posicionnan cu nan ta

ofrece y tambe e salarionan correspondiente cu e funcionnan. Te ainda e abogado no a ricibi e lista o sea cu e situacion ta mesun cos ainda.

Proposicion pa funcion
Den e reunionnan di siman pasa, señor Velasco y e abogadonan di AHE y RIU, a haci diferente proposicion pa funcionnan nobo. Esey a tuma su tempo y despues, e abogadonan mr. Faarup y mr. Figaroa a bay evalua cu e trahadonan den profundo e proposicionnan y kico e tra-

hadonan lo por spera di esaki.

Salario menos

E proposicionnan di AHE y RIU ta encera cu e salario lo baha pero cu a cambio di esey, lo duna un porcentahe chikito di e pakete cu a ofrece nan pa e retiro.

E proposicion di e delegacion di AHE y RIU ta algo parecido na loke nan a presenta na Departamento di Labor. Esaki tabata e prome fase. Awor ta den e fase cu e trahadonan kier haya mas claridad pa mira si nan ta acepta

e proposicion di funcion y e salario.

Actualmente ta den un fase caminda diferente situacion por presenta. Por presenta e situacion caminda e trahadonan no ta acepta e proposicion. Por presenta e situacion cu e trahadonan kier pa ahusta e proposicion y tambe por presenta e situacion cu e trahadonan ta bay di acuerdo. Tempo lo bay muestra kico lo bira e situacion pa cu e trabou cu Hues a ordena AHE pa percura pa e trahadonan haya. □